

VENDIM
Nr. 580, datë 3.8.2016

**PËR KRIJIMIN E PROGRAMIT PËR MBËSHTETJEN E EKONOMISË DHE
PËRCAKTIMIN E PËRFITUESVE E TË RREGULLAVE PËR ZBATIMIN E TIJ**

Në mbështetje të nenit 100 të Kushtetutës, të nenit 5, të ligjit nr. 8957, datë 17.10.2002, “Për ndërmarrjet e vogla dhe të mesme”, të ndryshuar, dhe të nenit 15, të aneksit 3, të ligjit nr. 147/2015, “Për buxhetin e vitit 2016”, me propozimin e ministrit të Zhvillimit Ekonomik, Turizmit, Tregtisë dhe Sipërmarrjes, Këshilli i Ministrave

VENDOSI:

1. Krijimin e programit për mbështetjen e ekonomisë, i përbërë nga dy nënprograme:
 - a) financimi i pjesëmarrjes në shoqëri tregtare dhe instrumente të financimit për bizneset *start-up*;
 - b) mbështetje financiare për ndërmarrjet e vogla dhe të mesme (NVM).
2. Programi për mbështetjen e ekonomisë ka burim financimi zërin “Shpenzime për buxhetin vendor: Fondi për Zhvillimin e Rajoneve”.
3. Objekti kryesor i programit është:
 - të shoqërojë investimet infrastrukturore, vendore dhe rajonale, me masa nxitëse ndaj aktiviteteve ekonomike brenda dhe rreth zonës ku do të investohet, sipas objektivave të politikës së zhvillimit rajonal;
 - të nxitë krijimin e partneriteteve ndërvendore dhe rajonale me partnerë publikë dhe privatë;
 - të financojë projektet zhvillimore të cilat nxitin zhvillimin e ekonomisë rajonale dhe krijimin e vendeve të reja të punës.
4. Nënprogrami për financimin e pjesëmarrjes në shoqëri tregtare dhe instrumente të financimit për bizneset *start-up* do t’u ofrojë mbështetje financiare, në formë granti të drejtpërdrejtë, njërive të qeverisjes vendore dhe rajonale dhe/ose, në formë kapitali në këmbim të aksioneve/kuotave, sipërmarrjeve të reja (*start-up*).
 - 4.1 Objektivat kryesorë të nënprogramit për financimin e pjesëmarrjes në shoqëri tregtare dhe instrumente të financimit për bizneset *start-up* janë:
 - a) mbështetja e partneriteteve midis entiteteve publike-publike si dhe publike-private;
 - b) ngritja dhe rivitalizimi i infrastrukturave në ndihmë të biznesit;
 - c) pjesëmarrja në formën e riskut të kapitalit;
 - ç) investimi për rivitalizimin dhe zhvillimin e sipërmarrjes publike në vështirësi.
 - 4.2 Gëzojnë të drejtën për të përfutur nga nënprogrami për financimin e pjesëmarrjes në shoqëri tregtare dhe instrumente të financimit për bizneset *start-up*:
 - a) njësitë e qeverisjes vendore;
 - b) Agjencia për Zhvillim Ekonomik Rajonal (në vijim Agjencia), pasi të kenë nënshkruar paraprakisht një marrëveshje bashkëpunimi/bashkëfinancimi me të paktën një nga entitetet e mëposhtme:
 - njësi të qeverisjes vendore;
 - agjenci të zhvillimit rajonal;
 - entitete publike;
 - sipërmarrje private;
 - organizata jofitimprurëse;
 - donatorë;
 - banka ndërkombëtare zhvillimi.
 - 4.3 Numri minimal i partneritetit në një projekt është 2 (dy) entitete, përfshirë përfituesit direkt.

Për skemën e financimit të pjesëmarrjes në shoqëri tregtare në varësi të vlerësimit për projektin e dorëzuar, aplikanti përfiton, nëpër-mjet bashkëfinancimit, në formën e grantit të

drejtpërdrejtë, deri në 50% të vlerës totale të investimit, por jo më shumë se 50 000 000 (pesëdhjetë milionë) lekë/projekti.

4.4 Për skemën instrumenteve të financimit për bizneset *start-up*, në varësi të vlerësimit për projektin e dorëzuar, aplikanti përfiton deri në 50% të vlerës totale të investimit, por jo më shumë se 25 000 000 (njëzet e pesë milionë) lekë/projekti, në këmbim të aksioneve/kuotave të shoqërisë.

4.5 Në kostot e pranueshme, që mund të bashkëfinancohen për financimin për bizneset *start-up*, përfshihen kostot për:

- a) shërbime këshillimore për hartimin e planeve të biznesit;
- b) projektimin për ndërtimin, zhvillimin dhe modernizimin e infrastrukturës së biznesit;
- c) blerje makinerish/pajisjesh;
- ç) rikonstrukcion të infrastrukturës së vendit të ushtrimit të aktivitetit.

4.6 Sipërmarrjet e reja (*start-up*), për të përfituar nga instrumenti i financimit, duhet të plotësojnë kushtet e mëposhtme:

- a) Të jenë ndërmarrje të klasifikuara si ndërmarrjet e vogla dhe të mesme (NVM), sipas ligjit nr. 8957, datë 17.10.2002, “Për ndërmarrjet e vogla e të mesme”, të ndryshuar;
- b) Të kenë selinë ose vendin kryesor të prodhimit brenda territorit të rajonit;
- c) Të kenë paguar të gjitha detyrimet e parashikuara nga legjislacioni doganor dhe tatimor;
- ç) Të jenë në gjendje të financojnë 50% të të gjitha kostove të projektit në fazën e aplikimit.

5. Nënprogrami i mbështetjes financiare për ndërmarrjet e vogla dhe të mesme (NVM) u jep ndihmë mikrondërmarrjeve, ndërmarrjeve të vogla dhe të mesme, nëpërmjet bashkëfinancimit.

5.1 Gëzojnë të drejtën për të përfituar nga nënprogrami i mbështetjes financiare për NVM-të të gjitha ndërmarrjet e vogla dhe të mesme (NVM) në marrëveshje bashkëpunimi me agjen-cinë, të cilat kanë siguruar paraprakisht shumën e bashkëfinancimit dhe kanë ekspertizën e duhur teknike për të zhvilluar me sukses projektin.

5.2 Në varësi të vlerësimit për projektin e dorëzuar, aplikanti përfiton deri në 50% të vlerës totale të investimit, por jo më shumë se 2 500 000 (dy milionë e pesëqind mijë) lekë/projekti.

5.3 Në kostot e pranueshme, që mund të bashkëfinancohen për këtë program, përfshihen kostot për:

- a) shërbime këshillimore për hartimin e planeve të biznesit;
- b) projektimin për ndërtimin, zhvillimin dhe modernizimin e infrastrukturës së biznesit;
- c) blerje makinerish/pajisjesh;
- ç) rikonstrukcion të infrastrukturës së vendit të ushtrimit të aktivitetit.

5.4 Sipërmarrjet, për të përfituar nga nënprogrami i mbështetjes financiare për ndërmarrjet e vogla dhe të mesme (NVM), duhet të plotësojnë kushtet e mëposhtme:

- a) Të jenë ndërmarrje të klasifikuara si ndërmarrjet e vogla dhe të mesme (NVM), sipas ligjit nr. 8957, datë 17.10.2002, “Për ndërmarrjet e vogla e të mesme”, të ndryshuar;
- b) Të kenë selinë ose vendin kryesor të prodhimit brenda territorit të rajonit;
- c) Të kenë paguar të gjitha detyrimet e parashikuara nga legjislacioni doganor dhe tatimor;
- ç) Të jenë në gjendje të financojnë 50% të të gjitha kostove të projektit në fazën e aplikimit.

6. Me qëllim zbatimin e programit për mbështetje për ekonominë, Komiteti për Zhvillimin e Rajoneve i kalon Agjencisë së Zhvillimit Ekonomik Rajonal fondin e planifikuar për këtë program.

6.1 Agjencia, me qëllim pjesëmarrjen e saj në skema partneriteti financiar, krijon një shoqëri tregtare (në vijim shoqëria), me 100% aksione/ kuota të zotëruara nga Agjencia, e cila operon dhe auditohet sipas legjislacionit në fuqi.

6.2 Drejtori i Agjencisë vendos për themelimin e shoqërisë, nënshkruan aktet e themelimit të saj, emëron administratorin e shoqërisë dhe jep autorizimin për pjesëmarrjen e shoqërisë në projekte financimi të përbashkët.

6.3 Detajet e partneritetit të shoqërisë me të tretë qartësohen paraprakisht në një kontratë

bashkëpunimi midis palëve, në të cilën përcaktohen qartë detyrimet e palëve, mënyrat e monitorimit të performancës së projektit, garancitë e nevojshme dhe format e auditimit të flukseve monetare mbi baza 3-mujore.

6.4 Shoqëria nuk ngarkohet me kosto shtesë për realizimin e një projekti, përveç atyre të parashikuara në kontratat përkatëse të bashkë-punimit.

6.5 Ndërkohë, shoqëria mund të vendosë që, për të rritur performancën e projektit, të marrë pjesë edhe në formën e bashkëmenaxhuesit të projektit, përmes përfaqësuesit të shoqërisë, i cili caktohet nga administratori i shoqërisë dhe paguhet nga projekti.

6.6 Format e pjesëmarrjes për programin për mbështetjen e ekonomisë janë:

- a) kontratë/marrëveshje partneriteti;
- b) shoqëria e qëllimit të veçantë (SPV), e krijuar për zbatimin e projektit;
- c) pjesëmarrja me aksione/kuota.

6.7 Në rastet kur pjesëmarrja është në formën e aksioneve/kuotave, shoqëria kur e konsideron qëllimin e përmbushur mund të transferojë aksionet/kuotat, sipas vlerës aktuale të tregut (përfshirë fitimet), sipas legjislacionit në fuqi, fillimisht tek aksionarët/ortakët e tjerë të shoqërisë dhe në rast të mosblerjes nga ana e tyre te të tretët. Të ardhurat neto nga këto shitje i mbeten buxhetit të shoqërisë, me kapital 100% të zotëruara nga Agjencia, për përdorim në programe të tjera partneriteti.

6.8 Për administrimin e pjesëmarrjes së saj në projekte partneriteti, qoftë me entitete publike ose private, shoqëria mund të përfitojë financim nga fondi i kontributit të saj, por jo më shumë se 5% të vlerës së fondit, për mbulimin e kostove të administrimit të shoqërisë, të marketingut, të shërbimeve mbështetëse si dhe të mjeteve të transportit, përfshirë kostot e mirëmbajtjes e të udhëtimit. Në përfundim të projektit, mjetet dhe pajisjet fizike të financuara nga projekti mbeten në administrim të shoqërisë për përdorim në projekte të tjera të ngjashme.

7. Komiteti për Zhvillimin e Rajoneve miraton financimin që do të administrojë Agjencia si dhe përcakton datën e fillimit të aplikimeve për të dyja nënprogramet.

7.1 Pas datës së parë të fillimit të aplikimeve, entitetet e përmendura në pikat 4.2 dhe 5.1, aplikojnë për projektet e tyre tek Agjencia, e cila luan rolin e sekretariatit teknik të programit për mbështetjen e ekonomisë.

7.2 Agjencia pranon dosjet e projekteve sipas formatit të përcaktuar në formularin e aplikimit, të hartuar nga Agjencia, dhe krijon data-bazën e projektaplikimeve. Në këtë fazë Agjencia mund të këshillojë aplikuesit të përmirësojnë dhe të plotësojnë më tej aplikimin me detajet e nevojshme që mund të kërkojnë për vlerësimin e projektit.

7.3 Për vlerësimin paraprak teknik të projekteve, ngrihet Bordi i Këshillimit (në vijim Bordi), i përbërë prej 7 anëtarësh me të drejtë të barabartë vote. Në përbërjen e Bordit të Këshillimit do të ftohen të marrin pjesë, pas një marrëveshjeje paraprake bashkëpunimi, pa pagesë, me mandat 1-vjeçar, personalitete të nivelit të lartë drejtues të institucioneve ndërkombëtare zhvillimore, financiare dhe të investimeve, që operojnë në Shqipëri.

8. Dosjet e të gjitha projekteve i paraqiten Bordit të Këshillimit në mbledhjen e zakonshme të tij, çdo 3 muaj, për analizimin, rekomandimin dhe vlerësimin e tyre teknik. Në mbledhjet e Bordit, për paraqitjen dhe sqarimin e projekteve mund të ftohen edhe vetë aplikuesit.

8.1 Për vlerësimin teknik të projekteve, Bordi miraton një metodologji të veçantë, ku ndër të tjera projektet vlerësohen edhe për:

- a) vendet e punës që synohet të krijohen nga projekti;
- b) vlerën e shtuar në rajonin përkatës, matur me numrin e sipërmarrjeve që mund të përfitojnë direkt dhe indirekt nga projekti;
- c) kohën e zbatueshmërisë së projektit, të shprehur në muaj;
- ç) risqet operationale dhe të performancës.

8.2 Pas përfundimit të vlerësimit, Bordi miraton me shumicë votash listën e projekteve teknike të vlefshme që mund të propozohen për financim.

8.3 Lista e projekteve të vlefshme teknikisht për financim i paraqitet Komitetit për Zhvillimin

e Rajoneve, i cili, bazuar edhe në prioritetet e qeverisë, miraton listën përfundimtare të projekteve që do të financohen, të cilën ia përcjell Agjencisë.

8.4 Pas miratimit të listës përfundimtare, drejtori i Agjencisë dhe përfaqësuesit e partneriteteve hartojnë kontratën specifike të bashkëpunimit në të cilën, ndër të tjera, përcaktohen kushtet e bashkëpunimit, detyrimet e ndërsjella, objektivat, menaxhimi, monitorimi si dhe afati për përfundimin e projektit.

9. Procedurat dhe kriteret për përzgjedhjen e përfituesve përcaktohen në rregulloren e funksionimit të programit për mbështetjen e ekonomisë, e cila miratohet me vendim të Komitetit për Zhvillimin e Rajoneve.

10. Për çdo projekt të financuar në bazë të skemave të financimit, sipas këtij vendimi, duhet të njoftohet Komisioni i Ndihmës Shtetërore, në përputhje me legjislacionin për ndihmën shtetërore.

11. Ngarkohen Ministria e Financave, Komiteti për Zhvillimin e Rajoneve dhe Agjencia për Zhvillimin Ekonomik Rajonal për zbatimin e këtij vendimi.

Ky vendim hyn në fuqi pas botimit në Fletoren Zyrtare.

ZËVENDËSKRYEMINISTRI
Niko Peleshi